



Reservoir Dogs

- VERBÂL dai scrutadors pes elezions dal diretîf de Pro Loco di S. Bernart ai dodîs di Març dal an e v.i... no stoi a lei dut, nomo?

A risultin elets siet conseîrs... chei che o vin dit, che o sin ducj culî, nomo, plui il sior plevan di dirit e trê revisôrs dai conts, come che o savîn cui che a son, no stoi a lei, vere mo?

E vuê ai sedîs di Març, il comitât al à elet il president, Filip, che o soi jo, ih, ih. E alore... o sin a puest. Bon, cumò o podin bevi un tai ducj insieme! Che o sin a puest.

- No, spiete un moment! Il president. Al scugne fevelâ; un discors, cumò al à di fâ un discors, une declarazion il president. Su, dai! Filip, dai!

- Oh, ma jo... no... jo... poben grazis a ducj pe fiducje, insume, viodìn di fâlis ben, lis robis, pe sagre, cumò che o vin cheste pro-loco, che la int nus à votâts, noaltris dal diretîf e po i revisôrs che a àn di controlâ... oh buine sere sior plevan, che al si comodi, saial o vin metudis lis robis in ordin, cun cheste pro-loco, o vin un diretîf, o sin in siet... veju culî che sin ducj, noaltris, siet e... vot cun lui, sior plevan, si capîs, par vie che culî dentri o sin a cjase sô, tal ricreatori, si capîs e po, il sior plevan, i vûl ben che al sei il sior plevan, nomo? E alore o vin chei siet culî, vot cun lui, come che o vin dit, ogni mût, nomo. E, in plui, i revisôrs, trê di lor, veju, chei che a àn di controlâ...

- Quis custodiet ipsos custodes?

- Eh?

Un cidin penç. Il sior plevan le à butade lì, chel latinorum ce vuelial dî? Dutcâs e samearès pesantute.

Come par une magjie disevot voi si zirin ducj bande di Diego. Diego che al è restât cidin dute la sere, al è l'unic lì dentri a savê un alc di latin, par vie di scuellis che al à di vê fatis di zovin. Al è ancje lui dal diretîf, che lu à votât, e alore, se lu à votât, la int, bisugne che al sei dentri, ancje se... no che al sei un trist om, ma... al puce un tichinin dal comunist e alore, intal ricreatori dal plevan... ma ce si aie di fâ? Votât al è votât...

Diego al tradûs:

- Cui controlie i controlôrs?

Cheste po! Eh sî! Che e je pesante! Filip nol sa di ce bande cjalâ. Di unusvuardi che Gjino, Peput e Bruno no vedin di ufindisi. A son lor i revisôrs e cumò il sior plevan al ven fûr cun chê dai custodis psissos e ce saio jo!

Ma Filip lu à fat president par alc e cumò, di president che al è, i ven sù une, une, une biele, propi nuie mâl.

- Che ju controli lui, sior plevan.

Ben poiade, bisugne ricognossi. E ducj a àn voie di petâi su une ridade, propi ben poiade, par rivuart al plevan no si pues ridi, ma... poiade, e je ben poiade, propi, brâf Filip. Tu puedis simpri dî che tu scherçavis...

E il plevan al è lui cumò che al barbote che lui al scherzave, ma no, sior plevan, al è di just che lui al controli, o sin culî a cjase sô, che al controli lui, va ben, va ben, o controlarai jo, ma, ma, mi fidi, mi fidi, al jere tant par dî, o scherzavi...

-Va ben, va ben... al scherzave... E cumò sî che o podin bevi chel tai in pâs e in compagnie! Vere? Nomo?

-No. Ancjemò une robe.

-Oh! Diego!

Filip al jere masse content di vêle comedade cun chê batude al sior plevan, ce aial di vê cumò chel Diego...

- Ce robe, Diego?

- No, nuie... dome... o volevi dome dî... e cui controlie il controlôr dai controlôrs?

di Laurin Zuan Nardin

#777